

Jemisihomi Utipiho

Kimandi Jemisihomi Utipimandapi Nesipihande

Jemisihomi so nyami Awaisihomi Jisaasihomi saingihore. Jemisihomi utipimandi kimandi jipatipaisura kinaungwiha 45-50 A.D. hura jipatipiyahande. Autaahaatihomi isihiya gaahaiwa kaitaatiwihaiwaapi saiwi kaiwi saiwi maasi sami naisihiyaisawi timaamaitiwi kiyaatinihini bimaawise undati kataunjati jipatipiyahande.

Jemisihomi Utipihopi Napimasataise

Jemisihomi komi isihiyai gaahure ipihirete undisiha (1:1)

Giwunyaitaatiwihandi naitaatiwihandapuni ami amitiha gaaha
naitaatiwihandapuni kaundisiha (1:2-8)

Isihiya kahapaamapipaisahiyaapuni ami kahapaamapiwa owehiyaapuni
katisiha (1:9-11)

Naañihaiwa ambipati yaasihaiwa nehaawi kandapi maipihaiwa kiyaati
timaamihaitihaawo tisiha (1:12-18)

Autaahaatihomi piwiha saimbi saimbi kaime, tirihireti kaitihaawo nehi ka
atisaati namaamawaato, tati katisiha (1:19-27)

Nyahi isihiya nahatiyaisi kiyaaninihi naasikati kawimi nutihaawo tisiha
(2:1-13)

Nyahi Autaahaatihopi nyami giwunyaahotihandi isihiyai nunjaati
anditiwitihaawo tisiha (2:14-26)

Nyahi nyami maahumwaañi omasiha biyaati jatitihaawo tisiha (3:1-18)

Nyahi Autaahaatihomi isihiyaanini gaahaiwa windi namaamawaati
kiyaaninihi kaiwa gaahaiwa kaimi nohoaatitihaawo tisiha
(4:1-5:6)

Ami piwiha wa wipiyaha kataunjisiha (5:7-20)

Nanyisendandihaiwa Nyangisaapihi Nanyoaipahonihini Andititaati Bitotihaawaahi Autaahaatichoaisaati Nga Biyaati Bimito

1 Nini Jemisihonini Autaahaatihomuni Awaisihomi Jisasi Kiraisihomi otipipatihonine. Nini Jemisihonini sahi Isiraherihyaati Jisaasihopi giwunyaahohiyihyaati sami aunahipati Isiraherihanda namasi yapihini nahanda nuwi toriwatohiyihyaatangisi, sami ambipati maariho nga

wisaitane, satataato. Saindi nini sapi utipimandi kimandi jipatipaindi nusoasataayo.

**Nasisendandihaiwa Wiwa Nasoaipahonaahi Saiwa Sangisi
Neti Watipisamaitandisi Andititiwi Bitosawise**

²Nisi naisihyaati nisataiwi Kiraisihopi giwunyaahohiyihyaate, kahapaamapipa kahatamatipetahaiwa kihaiwa kihaiwa nasisenati neti nasopisasati sangisaapihi nasoaipahonihi kaiwaapi, gaasotiwahi sahi maaritiwise. ³O napaapono, sawanaati aimi mmoniwihyaate, kahapaamapipa kihaiwa kihaiwa nasisenihaiwa sangisaapihi noipati nasisehonihahi, sami Kiraisihopi giwunyaahohitihandi sahi windi namapi namaamihaapi, mitaahi andititiwi isiwatawaawaahi sahi nasisesitihandapi windi timaamahiyawi naanati yaasihaiwa nepi watipihyaati andititiwi bitoaitaapo. ⁴Isi sahi saiwa kahapaamapipa yaasati, ami naanati nasisesiwaiwaapi yaiwi windi timaamahiyawi, kaiwa nepi kiyaatinihi sahi Kiraisihopi mwitewi watipitiwi giwunyaahohitihandi andititiwi isiwatimi nuwise. Saiwi isiwatimi nowaawi Autaahaatihomi ndiheti titihi nga watipihyaati andititiwi noaipapi, ami Autaahaatihomi gaahaiwa sangisi jatatananati anditisiwitandihaiwaapi sahi windi nenoahitiwi nausetihimetitaatiwo.

**Utaaho Wo Amitiha Gaaha Gwinyaitandihapi
Nenoahindaataahi Autaahaatihoai Nunjenati Gaapundane**

⁵Ami sami wo komi gaahandi gwinyaitandihandi nesi kaitandihira windi gwinyaati monataataahi kira nunjita so Autaahaatihoai nunjenane. Nunjehonihahi Autaahaatiho isihya wapaapi nunjehauhahiya nahatiyai nunjehohipipa itihitahi owemundati nehi nanihiyati iparimatati nunyahosi utaaso nunjesoi ko nunjesitihandi kandi titihi pihitahi koaisi numwitaise. ⁶Aisi utaaso komi gaahandi gwinyaitandihandapi Autaahaatihoai nunjeso maariho yiyahwi gwimunyaati nehi maariho naasohi gwinyaati, nisi nunjenihohipipa kapa titihi Autaahaatiho nanimitaiso, tati nunjenane. Maariho naasohitanihi nunjenane, tohitindi apaapimaato, utaaho maariho yiyahwi gwinyaataaho so itipihohi itipinataati iwiwirihoaisi ami durihiri neti ahoaihi noti nasataipamatayahore. ⁷⁻⁸Utaaso so iwiwirihoaisi itipihohi ami durihiri neti ahoaihi noti nasataipamatayahore. Iyati komi maariho yiyahwi gwinyaaso komi dahopa windi biyati dahomaayahore. Isi ko siyaho Autaahaatihoai nini wapaapi nunjenihohipipa ningi nanimitaiso, tati windi gimunyaane. Apipaahi owetitaise.

Ikipipaisahiyaati Ami Ikipipa Owehiyaati Maaritiwise

⁹Iyataati nyahi Kiraisihopi giwunyaahohiyihyaanami wonji ikipipa owehohi Autaahaatiho gisi autahihiwati kinyi omanjitihi

maarititaapihandi nahinyonaahi kinyi komi mwaahonjisi baimbi maaritime. ¹⁰ Ami kimi kiyaani Kiraisihopi giwunyaahohiyihyaanami wonji ikipipa taahipipaisahongi Autaahaatiho nahisendandihaiwa nahinyati yatihingihonaahi gaasi maarite, kinyi ikipipaisi ahosumwapi sawahopi giwunyaitaapi kahisataiso. Iyataati sandi apaapimaasato, tandipihomi kwitaaho niwawondiwishomatawi isihiya ikipipa taahipipaisawihiya kapa ahotanihi namasi napopi owetitauihandapito. ¹¹ Iyati ipiho watipihohi yahutaati titipwitisataati iwiwiriho tandipihohi usipaipati tihamasitihande. Tihamasihohi tandipihohi usipaipatami kwitaaho sanahiwiyati tisarisiwaiwa keti napitiateti niwawondiwati yapipataapihi timahiyati awasati namasaatihi ese tiwi mmoniwihiyaate. Isi siri kireti isihiya ikipipa kahapaamapipa taahipipaisahiya kaiwaatihi taawi mitihohi nusoaasawi anditati napamawaaheti keti napopi owetitaapo.

**Autahaatiho Nyangi Nanyisendandihaiwaatihi Windi Nanyamaasi
Namoti Nehi Gaahaiwaahihohi Jinjahira Nanyinyahore**

¹² Kahapaamapipa mambihaiwa utaaho Kiraisihopi giwunyaasihohi nunjehonihohi, kaiwaapi ko windi timaamahiyati anditititi watipihohi bitoti, ami komi Kiraisihopi giwunyaasitihandi windi namaamataataahi, Autahaatiho sawahoaisi isihiya maariho baiwi nunyohiyihiyai asiyaaimatiwi sawahoaisawi jinjapihi kiyaanihi bimitaatiwihandi numwitandi timanati katati ahaindihandi utaaso soaisi, kinyi apipaahi nga kiyapaise undati numwitaase. Nunyonihohi ko asohoematati Autahaatihoaisati maasi jinjapihi konihohi bimitaase. ¹³ Isi ko apipaahi akitinihi maaritane. Ami mambihaiwa nunjenati utaaho woaisi daihira maipihaiwa kaitandihira numwaasi niyonaahi kaiwaapi ko apipaahi windi samaatane, “Ese kimandi ningi nanisendandi Autahaatiho natausaasataise,” maatane. Owetane. O napaapono, Autahaatiho apipaahi titihohi gaahosi koaisi isihiya ami kahapaamapipa maipihaiwa ko napitaise, tiwi apipaahi maipihonjisangi windi namunjeniwihore. Owetise. Iyati ami ko isihiyaisi daihira maipihaiwa kaitaatiwihira apipaahi maipihonjisangi windi numwaasi namohore. ¹⁴ Ami utaahohi wapa mambihapa daihira maipihaiwa kaitandihira numwaasi naindindi, sawaho maipihaiwa kaitandi maaritati kaiwai komi maariho nunyati gwinyaasitihandi ahiwati numwaasi daihira sira notaise. ¹⁵ Iyati komi omanjititihohi maipihaiwa gwinyaasiwaiwa namoyaataati ausaimaninjihohi ko maipihaiwa akiwaiwa auta kiyataise. Aihohi maipihaiwa ko kaiwaiwa koaisi numwaasi daihira asihatahira napoti Autahaatihoai windi mausondandihira notaise.

¹⁶ Isi nisi naisihiyaati nisatawi Kiraisihopi giwunyaahohiyihiyaate, sawanaatami maariho gwinyaahohitihandi maipihaiwaatihi daihira nasisendandihira nasamaasi niyonihohi sahi windi samaatiwise,

Autaaahaatiho daihira maipihaiwa kaitihaahira nanyamaasi notaise tiwi windi asireti gimunyaapise. ¹⁷Kahapaamapipa gaahapa nyami ambipati maariho nyatatamanitandihapa nyahi nehohipipa nahataapa, nehi Autaaahaatiho sawaho yamihapataatihi maapi saasanotati nausainjiwaiwa ipiho waatiho kaumbwaati nahataapa kiyati ahaisihohihi nanyinyataise. Asisiha wiweti ipiho waatiho kaumbwaati yahutaati tihooati nusaatati, ami asisiha wiweti yahomutaati tihomwaati kaiwaami siwipati kihihooanjemati asihatindihandamatiyati Autaaahaatiho asisiha waatiho kinaungwiha wiweti gaahaiwa nanyinyati, ami asisiha waatiho kinaungwiha wiweti maipihaiwa nanyinyataamaise. Owetise. Nehi titihi gaahaiwaahihi Autaaahaatiho nyangisi jinjahira konihi nanyinyami notaise. ¹⁸Iyati nehi sawaho koaisi maaritati gwinyaasitihandaahi Autaaahaatiho noaipati nyami Apihoematataise. Iyati nyahi komi piwiha akaaha atiwisonihi ketapi nyangisi, kiya nisi manyinyaimatiwi nisihini deti nini nahataapa kahapaamapipa isihiya kaindi ahiyohipipaamihatihi kiyai aunahipati jihi nepi ami jihiyaimatiwi baiwi andititiwi daiwi bitoaito, tati maaritati gwinyaati Autaaahaatiho nyangisi japihi nanyamaataise.

Nyahi Piwiha Atisohiha Japepihiritihaawe

¹⁹Nisi naisihyaati nisataiwi Kiraisihopi giwunyaahohiyihyaate, piwiha kima nini sangisi kasatitandiyoni kaapi sahi baiwi gwinyaapise. Sahi nahatiyaati naasonihi naasaanihi baiwi sami maariho gaatonihi nihitiwi Autaaahaatihomi piwiha atiwi, ami mmoniwi nepi kipiwise. Saiwi maariho gaatonihi baiwi mwitipisawi atiwi mmoniwi nepi kipiwi, ami maariho noammapi baiwi gimunyaapi, ami maahomwaanji nusaapi piwiha atisohiha usaisi ausaapi kaundiwi keti kamaatiwise. Aiwi ami sahi wapaapi windi keti keti itihitiwi apomaasane. ²⁰Nini sangisi sahi wapaapi keti keti windi itihitiwi apomaasane, satohitindi apaapimaasato, utahonji wonji itihitipi aposindihanda daihira Autaaahaatiho titihi gaahaiwa kaitandi maaritati gwinyapesirihireti neti windi dahomutitaise. ²¹Isi maipihaiwa kahapaamapipa ainjotahaiwa, sami omanjititihini gwinyaapi kisamwindihi nasisoaari kaiwi, ami maipihaiwa gimunyaatahaiwa taawi kiyohiwaiwa nahatewa kaiwaanihi namapise. Aiwi yatihini ipatisaniwi Autaaahaatihomi otitihini bindawaawi komi piwiha sangisi apipaahi kiyaatangisihini nga japihi nasamaitandihaha, sami maarihoatihi omanjititihini nandapa isapipaamatiyati Autaaahaatiho yamati kisamososisiha baiwi nepi gwinyaapi isiwatiwi japepihiriwise.

²²Aiwi Autaaahaatihomi piwiha sahi nehi atihiraahihi atiwi gimunyaapise, Autaaahaatihomi piwiha biyaati atisaahiyaaninisi nyahi titihi gaahiyaanine, tiwi asireti windi gimunyaapise. Windi samaiwi atihira atiwi sami maariho omanjititihini jandoti, ami sami

auhiri ikwiri mbapi dopi piwiha atisohihaami akipipa autemapi kaiwi daiwise. ²³Utaaho wo Autaahaatihomi piwiha atisati ami windi biyati minjapepahirataataahi, so utaaho wo komi ndimaahomwaanji gaahonino, tati siwipihooatiji jatinjihomatiyataise. Nehi jatinati sendaayono, tati windi gimunyaati nanipimainjihomatiyataise. ²⁴Iyati keti nisi ndimaahomwaanji seta setahoniniso, tati jatinataahandi kandi noti keti kuraanihi nanipimatisihomatiyataise. ²⁵Ami utaaho wo Autaahaatihomi piwiha winihapipa isihiyaami ambipati maariho neti napaisaatumwahonihi nehi nanihaiwi kaisi japepahirataatiwiha biyati atisati mmonati jinjahira napaitati konihi japepahirataataahi, soaisi ko piwiha winihapipa japepahirati otipipipati kireti kaimbipaapi Autaahaatiho neti iwitatamanitaise. Iwitatamanitaisi ami ko maaritane.

²⁶Iyataati utaaho wo satati, “nini Kiraisihopi baindi giwunyaati koai neti mepi autaahemwati ami komi otipipati baindi kaindhonine,” tati gwinyaati ami komi omasiha windi maapatisati tipipati piwiha gimunyaati kandaataahi so komi piwiha satati, “Nini Kiraisihopi baindi giwunyaatihonine,” tati katindindi nehi otaatapihandi sawaho jinjaipinati kandaase. Iyati ko otipipati Kiraisihopi kaiwaiwaami akipipa owetise. ²⁷Iyataati Autaahaatiho nyami Apiho komi isihiya baiwi andititiwi giwunyaahohiyihiyaapi, kiya nisi gwinyaahohirihireti japepihiriwi apipaahi akititanaahi saito saito, tati gwinyaasirihira daihira siyati ahondaise: manyinya kiyaami saniya sapiya napwisaihi sawana binyaihihiyaisuni ami asihiya osinihiya sawana maasaimaarisu mimaipaiwi binyaihihiyai niwipaapi winjapi piwaundiwi kiyaami ambipati maariho iwitatamanitandihapa Autaahaatihomi isihiya nunyawu iwitatamanitaatiwe. Aiwi ami mambi kahapaamapipa ambipati maariho dahopai neti nusopisatandihaiwai nepusosawi anjini yandihi, Autaahaatihomi ndiheti komi maaritati gwinyaasirihireti Autaahaatihomi isihiya daiwi bitoaitaatiwe.

Isihiya Nahatiyaisi Naasaipiti Kati Kawisaati Maariho Numwitahaawo

2 ¹Nisi naisihiyaati nisataiwi nyami Awaisiho Jisasi Kiraisiho yamihapataatihapi apipaahi gaahaiwaami awaisiho saasanotahopi giwunyaapihiyaate. Jisaasiho siyati titihi gaaho apipaahi saasanotahore. Siyati saasanotahosi koaisi nyahi winjaatesi kopi giwunyaahohiyihiyaanini yawanaanini jatinihaawi, nyahi nauratihetahiyaanine. Nauratihetahiyaaninisi sahi isihiya wamwaanji wamwaanji wipetahiyaisi nepusosawi kihati kihati kamaawiwi naasaipiti kati nahatiyaisi osamapi kawiwise. ²Ami utaaho wo ikipipa nawiho taahipipaisaho apotihiri gaahapa niyoti yundanyainati Autaahaatihoai sahi mepi autaahepumaitaatiwi ahoyainjaihihapihi napitaise. Iyonihini ami utaaho wo ikipipa nawiho oweho apotihiri napwirinati yutaahaiwa niyoti

mimaipiyati napitaise. ³Utaahuri setahuri sami ahoyanohipipihi nammi nandaasaihi sahi kurisi usowi nepusosawi, utaaho apotihiri asipipa gaahapa niyoti yundanyainjihoai sahi saunditaapo, “Kinyi kimbibi yutihiri gaamiraatihi bime,” unditaapo. Undiwi ami utaaho ikipipa owesoai saunditaapo, “Kinyi sapihi bitose ami yatihiki kwaatipihoaatihi bime,” unditaapo. ⁴Sahi isihiyaisi naasaipiti kamaawiwi kihati kihati sahi kawiwu usowi numwaahohitindi Autaahaatihomi ndiheti sahi apipaahi gaahati kiyawaamaayopo. Sami omanjititihiki mimaipaiwi gwinyaapi isihiyaisi sami ahoyanohipipihi numwaawaawi sahi noaipapi isihiyaisi nepi tipitapaitaatiwihyaati maipihyaatimatawaayopo. Sandi sahi mmonawaayowo e owetiso?

⁵Nisi naisihyaati nisataiwi Kiraisihopi giwunyaahohiyihyaati nini maariho nasanyohiyihyaate. Atiwise. Isihya maapi yapipatambihya isihya usaapi satiwi, kiya ikipipa nawiho owetati ikwaatipihatime, tiwi gwinyaapi usomahohiyihyaaisi Autaahaatiho kopi giwunyaitaatiwihandi waati tisaipi nepi, ami ko winja bindataati kahapaamapipa gaahaiwa nunyonihiki nepi kiyaamihaiwaatitandi aimi maaritahi gwinyaati ahiwihihyaare. Iyataati saiwa koaisi maariho nunyohiyihyaaisi numwaati winjatataati numwitandi aimi timanati gwinyaati katati ahiyahaiwaare. ⁶Ami sahi isihya ikipipa nawiho owehiyaaisi mausihaiwa kawisawaayopo. Isihya dindiyaanihi sangisi nepi japatiwi nasopisasawi asisi isihya piwiha tipitapaapi mmonihohiyihiyenda niyopo? Isihya ikipipa nawihoaisawihya awaisawihya watipihyaaimatohiyihyaahihi saiwa sangisi kasisawaayopo. ⁷Siya kiya isihya ikipipa nawihoaisahiya sahi komi ambipati gaahati nehohiho Jisaasihopi maipihaiwa katiwi sisipihitawaahiyaare.

⁸Autahaatiho nyami Awaisiho nyangisi nyainjatisiho komi piwiha winihapipa jipatipindimbipaatihapi katisiha sahi baiwi japepihiriwi isiwatawaawaahi gaahati kiyawaayopo. Winihapipa satimbipaaro:

“Sahi ninaasonihiki kinyi kiwahoji maariho naminipi
witingipatamataimbi isihya usaisi maariho nunyapi wiwipe,”

Pirisihiya 19:18

tati katisihaapito.

⁹Ami sahi isihyaaisi baiwi kiyaami omanjititihiki dahopa windi mausopihandi, ami usaisi baiwi iwitatamaniwi maariho nunyawi wiwiwawaawi, ami usaisi mimaipiwisawaawaahi sahi maipihandi kaiwi Autaahaatihomi winihapipa nepi nopisasawaayopo. Nopisasawaayowi piwiha naitaapo. ¹⁰Nini sangisi sahi winihapipa nepi nopisasawaayopo satohitimandi apaapimaasato, sahi Autaahaatihomi piwiha winihapipa nehiki naasaindihisangi nepi sehimwaapi nopisasawaawaahi, sahi piwiha winihapipa nahataapa nepi sehimwaapi nopisasawaayopo, ndiha kasato. ¹¹Kimi kandapi Autahaatiho satise:

“Kinyi kinyi kiwiho kiwaamaati namasi wowaati nehoho nehahaati iwipi niwipaapi nanopi dahomaime,” *Japithi Numwaasiho 20:13-14* ndaase. Iyataati ami kimi ko satati kandaase:

“Isihiyaisi kinyi windi timaamape,” *Winihapipa 5:17* ndaase. Isi ami kinyi usihiya asihiya usaisi iwipi niwipaapi nanopi dahomaayapaahandi kandi isihiyaisi timmapaapaahi Autaahaatihomi piwiha winihapipa nahataapa nepi sehimwapi nopisasapaise. Nopisasapaini piwiha naitaape. ¹² Autaahaatiho komi piwiha winihapipa isihiyai kiyaami ambipati maarihoaisawi maipihaiwaami watipihandaatihi napwitiwi bimohitihandaatihapi nuwati numwaati nehahaatemati, neti napaisaatumwahonihahi nehi nanihaiwi kapa winihapipa japepihiritaatiwihapaara, sami piwiha katiwi kaiwi daayohiwaiwa tipitapaati jasondandihyaate. Isi Autaahaatiho nyangi sanyitandihyaaniso, tiwi kireti sahi nahataapa kiyohipipa baiwi mmotiniwi gwinyaapi kaiwi daiwi bitosawise. ¹³ Nini sandi sangisi apaapimaasato, ami sahi isihiyaisi sami maariho windi asipimaawiwihyaatangi Autaahaatiho neti tipitapaati jasonataahura sangisi windi maariho asipimaasitaihisato. Iyati ami sahi isihiyaisi sami maariho asipiwisawaawaahi siyaatangi Autaahaatiho neti tipitapaati jasonataahura ko maariho asipisitaise. Isi sandapi sahi baiwi jatiniwihyaati daiwi bitosawise.

Kiraisihopi Giwunyaahotihandisawi Gaahaiwa Kaiwise

¹⁴ Nisi naisihyaati nisataiwi Kiraisihopi giwunyaahohiyihyaate, sahi satiwi: “Nyahi Kiraisihopi giwunyaahaayo,” titaapo. Satiwi katawaahandi kandi sahi Kiraisihopi giwunyaahohitihandisawi isihiyaisi auta nunjawi kiyai iwitatamanitandihapa gaahaiwa kamaayawaawaahi piwiha nehi taanauhiahaiwa sahi katitaapo. Sahi satohiyihyaati otipipati akipipa owehandi nehi sami gwinyaahohitihandaahahi jinjahira nasisoari nga bimitaatiwihandi naitaawo? Apipaahi owetitaise. ¹⁵ Iyataati nyahi Kiraisihopi giwunyaahohiyihyaanami isihiya wowoaisangi ami apopiwaatisangi yutihiri apotihiri nandapa owetati, ami ambipatisi namaasapi niyopi, ami naniwi iwitatamanitandihapa owehiya bimitaapo. ¹⁶ Aisaihi sami woŋi yutihiri apotihiri nandapa owetisiho owetisaamaati saundiwi, “kinyi mitaahi windi gimunyaapi kinyi maariho yatihahi napaisaati wite. Witipi numwe Autaahaatiho gi owetimbipa nahimitaiso,” undiwi kiya owetimbipa kiyaami ambipatapihapa wapa sahi windi namunyawi nehi winjawaawaahi, kiyaami ambipati napa iwitatamanati anditiwitiwitaise? Apipaahi owetitaise. ¹⁷ Isi sahi Kiraisihopi giwunyaahohitihandi kasatirihireti japepihiriwi gaahaiwa kaiwi kandami akipipa ipi yandipihomataiwi windi sahi namaamoyaawaawaahi, sami Kiraisihopi giwunyaahohitihandi otipipati windi kamaayati napomati nehihanditati owendaise.

¹⁸ Ami kimandi nini sangisi kasatohitimandapi, sami wonji satitaise, “Nini wonini Kiraisihopi nehi giwunyaahonihi ami kinyi wonji otipipati gaahaiwa kiyapaise,” tipi katitaise. Sami wonji satitaini kaami wihoaajiha kimaasi nini kasatitaani sahi atiwise. “Sami wonji otipipati gaahaiwa windi kamaimbi owehandi nini Kiraisihopi giwunyaahohitihandi kimande, tipi ningi kinyi nga nanisitaino? Apipaahi owetitaise. O ami ninihi nisi otipipati gaahaiwaara Kiraisihopi nini giwunyaahohitihandi kimande,” hititi nahisito. ¹⁹ “Autaahaatiho naasohi bindataise,” tipi kinyi gwinyaapaise. Ese kihoe sandi gaahati kaimbi kinyi saimbi gwinyaapaise. Bwaasirihirami itipihoi maipihaiwaisangi siri kireti gwinyaapi sandaahi Kiraisihopi, ese ko nyangi yaasahaiwa nanyamitandihyaane, tiwi itipi yayawaayopo. O kinyi Kiraisihopi giwunyaahingitihanda kinyi maariho omanjititih wapa kaitaapihapaapi wipimaahimatataiso?

²⁰ Kinyi utaahoni apipaahi windi mopi naharimbihone, Kiraisihopi giwunyaahingitihandi, kimande undipi kinyi ausaimanipi gaahaiwa wiwa kamaayapaapaahi, kinyi nehi taanauhahandi gwinyaapaise. Isi sandapi akite tipi kinyi baimbi jahira mmonipi atimbi naitaapi wapa kahititi nahisitaano. ²¹ Nyahi Kiraisihopi giwunyaahohiyihyaanamasihi Abiraahamihoai jihura Autaahaatiho saundati, “Kinyi kimwaaho Isaakihoai tipi aritaahandaasini koaisinihi tihipi sisandipapi sosisihaatanihini ningi naninye,” undati nunjenataise. Saundati nunjesihi Abiraahamiho Autaahaatihoai atiwisati kaundimbipa titihini kaihi kandaahi koai Autaahaatiho saundise, “Kinyi nisi ndiheti maipihandi owehoni titihone,” undati usose. ²² Iyataati Abiraahamiho Autaahaatihopi anditititi giwunyaasitihandisati otipipati gaahaiwa ahoyati kiyataise. Iyati ko gaahaiwa kaiwaiwaara Autaahaatihopi Abiraahamiho giwunyaasitihandi noaipati watipititi nenoahimetati, ami titihini akitihandimatataise. Isi sandapi kinyi baimbi gwinyaape. ²³ Iyataati Autaahaatihomi piwiha Mosesiho jipatipiya sandaase: “Abiraahamiho Isaakihoaisi Autaahaatihoai sangi nunyataahura piwiha Autaahaatiho koaisi saundati, gisi kimwaaya gaasoya gaasisa taahiyihya nahimito undataase. Saundindihandapi nitanati maariho yiyahwi windi gimunyaati, nehi naasohi titihini kandimbipa kanisati nanimitaiso, tati kopi biyati anditititi giwunyaasihini mmonati neti, ami kandapi Autaahaatiho Abiraahamihopi sandaase, ‘Ko nisi ndiheti utaaho apipaahi titihini gaahore,’ tati kandaase,” tati Mosesiho jipatipiyataise. Aihini ipotihura Abiraahamiho Isaakihoai Autaahaatihoai numwihi, ami sura piwiha sa noaipati titihini akaahaimatataise. Aihini Abiraahamiho Autaahaatihopi anditititi konihini giwunyaati wapa kaitandi nunjesihapa atisati kaidihandapi Autaahaatiho kopi sandaase: “Ko apipaahi akitihinihi nisi naisohore,” ndaase. ²⁴ Isi sandi sahi wani mmonawaayopo, utaaho wo

komi Kiraisihopi gwinyaasitihandaahihi koaisi Autaahaatiho kinyi nisi ndiheti titihi gaahonje undataamaase. Owetise. Ko Kiraisihopi akitinihi gwinyaasitihandaahi gaahaiwa otipipati kaindihandaahimaawe. Nehi Kiraisihopi gwinyaasitihandaahihimaawe. Owetise.

²⁵ Ami apopaati waati jihura isihya kihyaami apopaatitahaati kaatami ambipati Rehepihaatisangi kimiri kireti kiyataise. Iyati kaati sata gwinyaataise, Isiraherihyaami Autaahaatiho akohosi nisi isihyaisi nemataahura ningi nehi ninjati nanimaito, tati Autaahaatihopi gwinyaataise. Iyati yapipati Kenaanihandi jami mmonimi usitaitaati Josuwaaho neti utaahuri yahuri natausaasisururi kaatami anjitihi numwaati sawahaatami isihya Isiraherihyaami tiworisa Kenaanihandaahapihyaapi kuri tiwitaawo, tati neti noasati daihira wira natausaasataise. Aihi sandapi Autaahaatiho kaatapi satati, “Kimaati apomaati nisi ndiheti itapaati titihi gaahaati noaipataise,” tati usonati gwinyaataise. ²⁶ Ami sandi sawanaati aimi mmoniwihyaate, utaahomi maariho ditihiri otipipati windi kamaayati owendaataahi ami ambipati napotaise. Isi siri kireti sahi Kiraisihopi gwunyaahotihandami gaahaiwa otipipati wapa kamaayawaawaahi, sami Kiraisihopi gwunyaahohitihandi utaaho napomasihomatiyati aimi napomataisi sangi windi maasitataman itaise.

Nyami Omasiha Naitipwirisaati Timipipaitihaawo

3 ¹ Nisi naisihyaati nisatawi Kiraisihopi gwunyaahohiyihyaate, piwiha kima kasatitaani atiwise. Sahi taahiyihyaati noaipapi katiwunjitaatiwihyaatimatiwi isihyaisi windi katiwimunjawise. Sandi apaapimaasato, sahi sawanaati aimi mmoniwihyaate, nyahi isihyaisi komi piwiha katawaunjohiyihyaanangi Autaahaatiho apipaahi waati autaahi wamwaanji neti tipitapaati nyasondaise. Iyati komi piwiha wiwa newaati nyahi isihyaisi asireti katawaunjaati daisaihihaiwaapi, isihya nehiihyaisi tipitapaati usositihandi nusatipihandi Autaahaatiho nyangisi apipaahi mitaahi autaahi wamwaanji tipitapaati nyasondaihihandapito. ² Nyahi nahatiyaanini napepaawaati mimaihiyaati piwaataati kiyati daayaahyaanane. Utaaho wo mimaihiyati piwaatati kamaayataataahi so titihi daayati bitoti, ami sawahomi ambipati kahapaamapipa katati kaimbipa biyati gwinyaati kata kiyati anjini jatinati bitondaate. ³ Iyataati sawanaati aimi mmoniwihyaate, ami maasapiho awaisiho osiho isihyaisi awiritimasi nutandi gwinyaawaawi isihya osihomi maahomwaanji ainihiri maipihonji ningaupwi wirihiri wihiwihooanji wirapi isiwataawaawi kihihooanji kihihooanjemahauhi osiho isihyaisi kiya nutaatiwi gwunyaahohipihapi titihi numwaasi notaise. ⁴ Ami durihiri awairihiraatihi kopuho wo awaisiho daisihopisangi sahi gwinyapeniwewise, kopuho apipaahi naanjati awaisihoai itipihohi

watipiho itipinati neti kihihooanemasihini notini nasayata tiwandonihini isihiyani titihemapi windi nesi namutaahetaho ko titihemaitaatiwini saihiramatatohonjini maipohonjini kiyohonyonjini, utaahe isiwatini titihemasihini nga durihiraatihini komi gwinyapenatini titihemapi nairihirini kiretini titihini naise. ⁵Iyatini ami omasihaisangini siri kiretini apipaahini maipohonjindaahandini kandin, ketapini noaipasiwaiwani notini awaiwaiwaimatatin isihiyaisini netini numwanataise.

Iyataatini ami sahi sawanaatini aimi mmoniwihiyaate, sisihani tihwitihirini apipaahini turikaarehonjini tihatini naitipwirisataatini otitihini ainjipatin iwiwirihini gaamatini tihatini owemasihini. ⁶Ami nyamini omasihaisangini siri kiretini maahomwaaanjini nonasayani tipipatin naitipwirisatini sisihaamatiyahaare. Siyatini sisihaamatiyahaasini nyamini ambipatetini ahendaatini piwihi kahapaamapipani maipihaiwani namoyaasihini nyahini omasihani maahomwaaanjini tipipaatin piwihi maipihaiwani kataatini kiyonihini kaiwani nyamini ambipatin isihiyaanamini maarihi piwihi otipipatin dahopani nahandini netini mimaiipianyusoaasatini nanyopisasataise. Iyatini omasihani tipipawaatini nyahini kataatini kiyohiwaiwani netini nyahini isihiyaisani piwana daayaatini bimohitihandini nahandini netini nopisasataise. Iyatini Bwaasirihiramin itipiho maipihaiwani gwinyaahohiwaiwani nyamini maahomwaaanjini nepini wipinyosawini omasihani nepini nyaipipihauhini piwihi maipihaiwani kataatini isihiyaisini newaatini nyahini nopisasahaayo. Sisihani nyamini maahomwaaanjini omasihetini ahotisihani sa sisihani maipihaiwani isihiyaini ipotihurani tihatini yaawihandini numwitandihaaamin sisihaare. ⁷Iyataatini ami maasapihoni asipihoni koho akwiraniho, ami waapihaatetapini araihi kahapaamapipani ainjhipipaisini isihiyani nga ipatisawini numwaaipini yamanitaahetani, ami ipatisawini numwaaipini yamanihauhini isihiyaamin piwihi atisatini nandapani nanatini isihiyani numwaaipini yamanihohiyihiyaaamin asimwaaatitihini yatihini otitihini bimotini sanotini noaipatin yamanyipipaimataise. ⁸Aimini aimapini saiwini nasawaahandini kandin kiyaamin omasihani maahomwaaanjini windini nga ipihatiwini minjatopo. Apipaahini owetise. Omasihani noaipatin apipaahini daahini maipitatini ainjotatin, ami isihiyaini nga tiwamaitandini onaapipaimataise. ⁹Nyamini omasihaisaatini maahomwaaanjini nausaawaatini nyamini Awaisihoni Apihoni Autaahaatihoi kinyini gaahone, undaatin mepini autaahewaumwihaayo. Iyaatini ami omasihani kimikani tipipawaatini isihiyani Autaahaatihoni sawahoni komi maarihi omanjititihini mmonatini gwinyaasipatamataiwini mmoniwi gwinyaapihiyaisini kiyatini ahiwihihiyaini nyahini piwihi ainjotatin maipihaiwani kaundaatini nusopisasaatini, ami kiyaapini dawaataatapini piwihi katahaato. ¹⁰Piwihi Autaahaatihoi kinyini gaahone, undaatin mepini autaahewaumwaahauni, ami piwihi isihiyaisini newaatini mimaipiwisaatini nusopisasaahauni ahoyaatini omasihani tipipawani maahomwaaanjini naasaimumwaaanjini katahaato. Nisini naisihiyaatini nisataiwini Kiraisihopini giwunyaahohiyihiyaaate, nyahini siyaatini windini kamaitihaawo. Apipaahini owetane. ¹¹Nyahini yawanaanini aimi mmonaahiyaane, waapohoni gaahoni yapipataatihapini taatini mwitituhahoni waapohoni jipiyahounini ami waapohoni anuwatini jimaayahoni ahoyatini windini namoaase. ¹²Iyatini kinnihetapini pangirini windini namingose.

Iyati ami tusaahetapi kinniha windi namingose. Iyati nehi titihi yandipiho ipati katamihohi ningose. Iyati ami waapoho arjuwahoaisati waapoho ami jipiyahoaisati ahoyati windi namoaitaise. Piwiha isihyaami maahomwaaŋapi noaipasiha siri kireti ahondaise.

Isihya Gwinyaitaatiwihandi Gaahandapuni Maipihandapihaare

¹³Sami otihatihapi utaho wo satati, nini gaahandi gwinyaitandihandi nesisi kaitandihira mmonitihonine, tati kandaataahi komi gaahandi gwinyaitandihandi nesi kaitandihira mmositihandami akipipa sapaare tiwi isihya mmondaatiwi ko amitiha gaaha gwinyaasitihanda gaahaiwa kiyati, ami titiho bimoti komi maarihoatihi bipi yatih ipatisanati daayane. ¹⁴Ami sahi sawanaatami ambipati autaahemapi tihaapaiwi, ami sami omanjititihapi isihya usaapi manditaiwi gwinyaawaawaahi sandapi sahi windi gemaamaniwise. Aiwi genaniwi nyahi Autaahaatihomi piwiha akaaha nahataapi amitiha gaaha gwinyaitihaahandisahiyaane, tiwi sahi jaipimaatiwise. ¹⁵Saiwi sahi amitiha gaaha gwinyaitaatiwihandi nesi kaitaatiwihira mmonihohitindi Autaahaatihoapihapi nasahandimaawe. Owetise. Kandi maapi isihya yapipatabihyaamihande. Iyati ambipati omanjititihapi maariho jahihomihande. Iyati ami sandami sapiho Bwaasirihirisi kiramihetapi nasahande. ¹⁶Iyataati ami isihya sawanaami ambipati autaahemapi ami kiyaami omanjititihapi isihya usaapi manditaiwi gwinyaasaihihapihi daihira isihya mmowi daitaatiwihira niwipitati naharimatati isihya nepi mihoaihiriniwi nopisasiniwi maipihaiwa kahatamatipetahaiwa noaipaitaise. ¹⁷Ami isihya amitiha gaaha gwinyaitaatiwihandi nesi kaitaatiwihira mmonihohitihandi Autaahaatihoapihapi nasahande. Isihya kandi nehohiyihya kiyaami maariho omanjititihapi gaahaiwa titihi saasanotahaiwaahihi jiji gwinyaapi kaitaapo. Kaiwi ami kapihi isihya usaisi napaisaati bipi winjapi piwaundiwi maariho gaaho kipwiniwi atihiri atiwoPETIWI, isihyaisi maariho asipiwitaatiwihandi kiyaamiheti tisaitati, ami isihyaisi gaahaiwa kawiji namoyaawaayopo. Aiwi ami isihya usaapi mimaipaiwi gwinyaapi sawanaami ambipati windi autaahemapi gemaananiwi ami piwiha windi jaipimaatiwi otaatapihaiwa kahapaamapipa windi kamaayawaayopo. Owetise. Ami isihya amitiha gaahandi gwinyaitaatiwihandi Autaahaatihoapihapi napindihandi nehohiyihyaahi isihya nahatiyaisi nehi gaahati naasapiti kati kawisawaayopo. ¹⁸Iyataati isihya satiwi, nyahi isihyaisaati napaisaati bimitihaawo, tiwi gwinyaahohiyihya kireti japepihiriwi kaiwi bindawaayopo. Saiwi bindawaawi isihya usaisi nepi nunjauhi nehi titihi gaahaiwaahihi isihya kiyaami bimohipihapi kiyawaayopo.

Isihya Yapipatabihaiwaisaahihi Maariho Nunyahiyihya Autaahaatihomi Tiworisaare

4 ¹Sahi piwihaara tunniwi itihinnohiwimaiwa samihatihapi ahotiwimaiwa maahiraapi nasahaiwaare? Saiwa napirihiraapi

kasatitaani atiwise, sahi sawanaati yapipatambihaiwaisaahi maariho nunyauhi kaiwaapi maariho jandosiwaiwa sami ambipateti ahondaati neti tunnati yahwinjihi, ami sahi satiwi saiwa nyamihaiwaatito, tiwi gwinyaapi sahi piwihaara nepi tunniwi munniwi itihinnawaatopo. ²Sahi kahapaamapipa ambipatapihapa naitaatiwi maariho pihitai jandotaahandi kandi kapa sahi windi namehopo. Namewaawi isihiyaisi timaitaatiwi gwinyaawaayopo. Kahapaamapipa ikipipa naitaatiwuni ami isihyaami ndiheti autaahi awaisawihyaatimatitaatiwi wapa sahi naitaatiwi sami maariho apipaahi jandoti kiyataahandi kandi sahi windi kapa namehopo. Namewaawi sahi dopi itihinniwi nepi tunnawaayopo. Aiwi sami naitaatiwi gwinyaahohiwaiwa namehohitindi ami sahi kaiwaapi Autaahaatihoai windi namunjenawaawi namewaayopo. ³Ami kaiwaapi Autaahaatihoai nunjeniwi gaapundawaahandi, ami kaiwa sahi windi namehohitindi, ami sawanaatami ambipati maaritai kasatirihiretihi naniwi daitaatiwi nunjenahauhi Autaahaatiho windi namaasanyataise. ⁴Ese sahi isihyaati isihya apwaatiya warisai namasi asihya usihya usaamihiyaisawi daayohiyihyaamatawihyaate. Ami isihya kahapaamapipa yapipatambihaiwaisaahi anditai napamapi kiyaami maariho kaiwai nunyohiyihya siya Autaahaatihomi tiworisaimatawaayopo. Sahi sandapi mmoniwihiyaato e owetiso? Isi wowaati maapi yapipatambihaiwaisaahi komi kaatami anditai napamati maariho nunyamataataahi, so saati Autaahaatihoai pohipaiwimapi noipati komi tiworihom tiworihaitimatataise. ⁵Autaahaatihomi piwihaatihi piwiha wa satati jipatipindise. Iyataati sa piwa nyami maarihoatihi bimitandi komi ditihiri mbipa itipihom^a nyangi nanyamisihopi Autaahaatiho sata kandaase:

“Kahapaamapipa maapi yapipatambihaiwaapimaayati nehi nisapaahaito tati apipaahi awaindihandi gwinyaati apousataise,” tise. Satisi sahi piwa sa nehihandi kandaase tiwi gwinyaawaayowo?

⁶Iyataati ami nyami ditihiri mbipa maarihopi Autaahaatiho nehi nisapaahaito tindihandapi gwinyaataati nyahi anditititihahandi apipaahi awaindihandi nasisoaari nanyinyataise. Aihom sandapi Autaahaatihomom piwiha satise:

“Isihya watipihandisahiyaanine, tiwi naimaatiwi genanohiyihyai Autaahaatiho neti yatihiwati ipatisati tiwandamataati, ami isihya watipihandi owehiyaanine, tiwi yatihom ipisanohiyihyai anditititititihandihom Autaahaatiho nunyahore,” ndaase.

Ga Bimisiho 3:34

⁷Isi ami sahi Autaahaatihoai atiwihom komi otitihom pinuwise. Aiwi Autaahaatiho watipihandi nasamindihanda Bwaasirihiri nasati

^a 4:5 Ami komi Itipihom Gaahopeti ami nehi ditihiri mbipa isihyaaname maarihopetise, ami piwiha windi titihom namoaipaso.

maipihaiwa kaitaatiwi maariho jandohaiwa nasisehonihini owe undiwi kiri tipindiwimapise. Tipindiwimasaihi sangisi nasamasi kirinihi yanihimaitaiso. ⁸ Aiwi ami sahi Autaahaatihomihini deti nuwisa. Sahi saisaihi ami Autaahaatihoaisangi samihini deti nasati bitonda sangisi anditisaiwitaise. Isihiyaati sami omanjititihini maipihaiwa gwinyaapi kiyohiyihyaati maipihaiwa nemapi titih gaahaiwaahihini sami omanjititihini gwinyaapi kaiwisa. Ami isihiyaati sami maariho omanjititihini yiyatiwi Autaahaatihopuni maipihaiwaapuni maawi gwinyaahohiyihyaati yiyatiwi gwinyaahohitihandi namapise. Namapi nehi maariho naasohihini Autaahaatiho sawahopaahihini baiwi andititihini gwinyaapise. ⁹ Saiwi sahi maipihaiwa gwinyaapi kiyohiwaiwa Autaahaatiho nesamaita sahi maariho asipaiwi kaahaatiwi nehohiwini ami akitihini kwitipati nuhaapi gwiwisa. Aiwi sami sihopa piwiha aunihihini namapi kaahaatiwi nehohiwini gwihini, ami sami maarihi sisiwi aunihiyohitihandi namapi sahi sami maipihaiwa kiyohiwaiwaapi gwinyaapi sami maariho apipaahi akitihini naajati tisanane. ¹⁰ Saiwi sami maipihaiwaapi sahi maariho tisonihini Awaisihomihini ndiheti yatihini ipatisaniwi komi otitihini pinuwisa. Saisaihi sangisi Autaahaatiho nasamaati anditisaiwitando.

Sahi Sawanaatami Woaisi Windi Tipitapaapi Mausowise

¹¹ Nisi naisihiyaati ningisawi maawi nisatawi Kiraisihopi gwinyaahohiyihyaate, sahi sawanaatapi nepi ko siyataise siyataise tiwi piwiha titihimetihini kaniwi katiwi nepi sami ambipati ndimaahomwaaapi namopisasinini namopisasiwisa. Owetane. Utaaho wo komi naisoho Kiraisihopi koaisati maawi gwinyaasihopi komi ambipati ndimaahomwaaapi neti mimaipiyawusoasati piwiha titihimetihini katati tipitapaati usoso so Autaahaatihomihini winihapipa saimbi isihiyaisi windi kamaawime timbipa gaahapaamaahe, nini windi minjapepihirito, tati so Autaahaatihomatihini noaipati kapaisi neti tipitapaati mmonataise. ¹² Nehi Autaahaatiho sawahohihini isihiyaisi winihapipa numwisihore. Numwisihosi nehi sawahohi isihiyaisi neti tipitapaati usonati maipihaiwa kaisaihihiyaisi nemati, ami isihiya ainahiyihiyaisi japihi numwaati windi namaamaitaise. Isi kinyi utaahonihini naasonine, tipi ami kinyi naisoho kiwahonyihoyaisi tipitapaapi usohise?

Sahi Genaniwi Amitihaisahiyaane Maatiwisa

¹³ Sahi isihiyaati usaati satawaatopo, “wanisangi ami bousonihisangi aunahipati ahapihi sata nowaati kinaungwiha naasaahi newaati nawihopi otipipati kiyaati nawihohi asakiyaati naitihaawo,” tawaatopo. Sahi satohiyihiyaatangi nini piwiha kima kasatitaani baiwi atiwise.

¹⁴ Kahapaamapipa bousonihini noaipati ami sangi nasoaipaitandihaiwaapi

sahi windi mohopo. Sahi sami dahopa daiwi bitohohirihireti tiwipati ikwaatipihati noaipati nehi masehonji tiwipapipyati owetipatamataiwihyaate. ¹⁵Piwiha sami nawihopi otipipatapiha katiwi gwinyaitaatiwaahi sahi kimireti satiwi katitihande, “Awaisiho Autaahaatihomihandisi ami ko nyangisi biyati nyainjaatohonaahi bindahaawi sapa sapa nyahi kaitihaawo,” titihyaate. ¹⁶Satitihyaatisi ami kandi sahi windi kamaatiwi sahi genaniwi sami amitiha gwinyaahohiwaiwaapi tihapitawaatopo. Sami amitihaapi genaniwi sahi tihapitohiwiwa titihimahe. Sandi sahi satawaatopo, Autaahaatihoai daihira nanyisitandi windi namunjendiho, tiwi sahi nehi sawanaatami gwinyaahohirihireti kiyawaayopo. ¹⁷Isi ami sahi baiwi gwinyaapise, utaaho Autaahaatihomi piwiha sireti gwinyaapi otipipati kaimbi daimbi bitose undihi gwinyaasirihireti japepahirati windi kamaayataataahi, so Autaahaatihomi piwiha nemati maipihandi kiyataise.

Isihyaati Ikipipa Taahipipaisahyaati Jatiniwi Daiwise

5 ¹Isihyaati ikipipa taahipipaisawihyaate, piwiha kima kasatitani baiwi atiwise! Kahapaamapipa apipaahi maipihaiwa yaasati naanjhaiwa sangisi Autaahaatiho asisiha ipotiheti isihyaaisi neti tipitapaataahura nasanyati nesamaitandihyaatisi awiritiwi gwiwi bimaawise. ²Sami ikipipa nepi nehihandi ahoyohipipa kahiho nanati kahiwati namasaatati ami sami apotihiri yutihiri isipipa naapiho nanati napwirinataise. ³Ami sami nawihoaisangi yosoamatataise. Iyataati yosoamatindindi sahi nawiho isihyaaisi wapa namunyawi, ami Autaahaatihomi otipipatapi wapa namunyawi nehi sawanaatapaahihi nepi ahoaiwi maipihyaate, tati ausaimanataise. Iyati kaiwa neti sami ambipati maarihoai yosoamatati sisihaaraahamatiyati tisatati nesamaitaise. Asisiha kimaiwa ipotimaiwa wani Awaisiho isihyaaisi winjatiwimaiweti sahi ikipipa nawiho, ami wapa apipaahi gaahapa gorihandi siriwaahanda kaiwihapa sahi asakaiwi nepi ahoyawi nehi kaiwaisaahihi maariho nunyawimawaayopo. Ami sahi siyohitindapi Autaahaatiho sapi apowindihandi sisihaamataiwi nepi tihoaapi nainamaanjimi nowaayopo. Siyawaayowi ipoti Kiraisiho japihi nasonihura Autaahaatiho isihyaaisi neti tipitapaahonihura kandi sangisi sisihaamatiyati tisatitaise. ⁴Saiwi nawiho nehi sawanaatapaahihi nepi ahoyawaawi isihya sami osaataati anipiho tisatiwi kitaha otipisiwi nandapa kisamohiyihiyai nawiho sahi windi namunyopo. Isi sahi kiyai namunyohitihandapi kiyaami gopa itihapipa gwiwi itihitohipipa baiwi mmoniwi gwinyaapise. Sami nandapa kipiwi ahosisohiyihyaami gopa gapipa Autaahaatiho isihya kahapaamapipa nahatewa daahemwati Awaisiho Apipaahi Watipihomi atihomwaanji noaipasihi aimi mmonati atiwise. Atiwisi kiyaapisatati sangisi tisawati

nesamaitaise. ⁵Autahaatiho itihisatati nesamaitandihuraapi sahi windi gimunyaapi nehi nanihaiwi sangi ikipipa nawiho nandapa, ami wapa apipaahi gaahapa taahipipaami tiwathihaati maaritiwi bipi napaisaati sanahiwaiwi bindawaayopo. Autahaatiho sangisi neti tipitapaati jasonati nesamaitandihuraapi sahi ikipipa nawiho taahipipaisahiyaati windi yaiwi mmotinihopo. Saiwi sahi maasapiho isihiya tiwitaatiwihuraapi keti gwinyanati gwisaha neti wiraitandi nandapa pihitiwi nunyohihomataiwi Autahaatiho neti tipitapaati jasonati nesamaitandihuraapi sahi nawiho, ami wapa gaahapa ikipipaami autaahi bindawaawi nepi timanjnawaayopo. ⁶Sahi isihiyaati ikipipa nawihoaisawihyaati isihiya ikipipa nawiho owehiya titihi gaahiya ainahiyihiya sangisi windi tipindiwi nepimaasamahauhahandi kandi, sahi kiyaisi numwaasi isihiya piwiha tiwitapaapi mmohohiyihiyaapihi nuwi napowise, tiwi napupwi nepi tipi yamwaapihiyaate. Isi sandapi sangisi Autahaatiho isihiyaisi neti tipitapaataahura yaasihandi maipihandi wihoanahandi nasamitaise.

**Nyami Omañititih Andititaati Naañihaiwa Newaati Nyami
Awaisiho Napitandihuraapi Biyaati Jatitihawo**

⁷Nisi naisihiyaati nisataiwi Kiraisihopi baiwi giwunyaahohiyihiyaate, nyami Awaisiho jahira napitaisi sahi sangi yaasati naañihaiwa nasoaipasiwaiwa bipi watipitiwi bitotawa nepise. Nepi sahi windi pohipimaiwi kiyaatinihi baiwi jatiwise. Sawanaati aimi kimandapi mmoniwihiyaate, osaataati wanihaatami satiho nandapa isapipa niyaamatosati wipati nandapa jihi nimaatati gwinyandandihandapuni, ami ipoti akipipa namoyaati timetonihi kipwitandihatapi windi monataahandi kati wipiwito tati jatimi naiho. Iyati komi osaataati nandapa akipipa sanahiwiyati gaahapa nimaatati namoyaito, tati pohipimaayati konihi biyati jatimi naihi sahi aimi mmoniwihiyaate.

⁸Aiwi Awaisiho keti wo namaasonihandi sangisi yaasati naañihaiwa isihiya nasamisaihi kopi giwunyaahohitihandi anditititwi sahi isiwatiwise. Awaisiho napitandihura aimi detindaisi kiyaatinihi jatiwise. Ami otihimetani keti ko napitaise.

⁹Nisi naisihiyaati nisataiwi Kiraisihopi giwunyaahohiyihiyaate, sahi sami usaapi itihitiwi piwiha kaniwi ami dawaataatapi kamaatiwise, ami Autahaatiho sangisi neti windi tipitapaati jasonati sahi maipihyaatisi sami maipihaiwaapi piwiha nepise maasatito. Sahi nepi windi tipitapaapi mmotiniwise, ami isihiyai neti tipitapaati usondandihoho Autahaatiho windi otihimetanihi keti nasati isihiyaisi neti tipitapaati usondaiso. ¹⁰Iyawaawi nisi naisihiyaati nisataiwi Kiraisihopi giwunyaahohiyihiyaate, sahi isihiya jihura Autahaatihomi piwiha atiwi nepi ausaahohiyihiyaapi baiwi gwinyapepise. Jihura kiyaisi isihiya yaawati naañihaiwa nunyauhahandi kandi kaiwaapi kiya windi yamaiwi

andititiwi bitotawaawi Awaisihomihaiwaapi piwiha ausaapi katopo. Isi sahi kiyaami ikwauhiri itipati winjapepihiriwise. ¹¹Kiya saiwi yaawati naanjhaiwa nepi awitimapi niyauhi Autaahaatiho kiyaisi anditiwiwati maariho numwihi kandapi nyahi kiyaapi satahaato, “kiyai Autaahaatiho iwitatamasihi kiya yaawihaiwa andititiwi nepi ami maaritawaayopo,” tahaato. Iyahaawi ami sahi aimi Jopihopi atiwihiyaate, Autaahaatiho koaisi yaawati naanjhaiwa asakiyati nunyati komihapa nahataapa nemasihandi kandi ko Autaahaatihoaisi windi namaamati konihi anditititi giwunyaapi naiho. Aihi sandapi Awaisiho Autaahaatiho Jopihoihoaisi kahapaamapipa jhaati asakiyati nunyati iwitatamasiho. Sandi isihiyaisi Awaisiho maariho nunyati asipiwisahosi ami gaahati kawisati kaiho.

**Autaahaatihomi Ndiheti Piwiha Akitiha
Kandaato Taati Windi Kamaatitahaawo**

¹²Nisi naisihyaati nisataiwi Kiraisihopi giwunyaahohiyihyaate, piwiha kima apipaahi watipiha kasatitaani sahi baiwi atiwi gwinyaapise. Sahi wapa kaitaatiwi gwinyaawaahapaapi isihiya usa atisiwi jainjasaihi sahi windi piwiha bipinjawi timaniwi samaatiwise, “nini sapa sapa ipoti kaitandi akitinihi yamahipataatihi bimesiho Autaahaatiho ninjasih komi ndiheti kandaato,” tiwi kamaatiwise. Apipaahi owetane. Nehi akipipa kaiwise isihiya jainjaito. Aiwi akiti wapa sahi kaitaatiwi gwinyaawaahapaapi isihiya usaisi piwiha timaniwi jihi kaunditaatiwaahi nehi saundiwise, “akitinihi sapa sapa kaito,” undiwi kireti kapa kaiwise. Ami wapa kamaitaatiwaahi sahi nehi saundiwise, “sapa sapa windi kamaito,” undiwi ami kamaiwise. Nehi sa ka satiwi namapise, ami sahi saisaihi Autaahaatiho samiheti maipihaiwa kaiwihyaate, satati piwiha windi neti yahomaasutaito.

**Kiraisihopi Baiwi Giwunyaahohiyihya
Ainahihiyaami Gaapipati Watipihate**

¹³Iyataati sami wo komi maariho ambipati dahopa neti yaawati naanjhandi nusopisahasaiwa netaataahi so Kiraisihopi gaapundane, koaisi Autaahaatiho anditiwiwito. Iyati ami sami wo komi maariho ambipati dahopa gaatanihi ko maariho witati maaritataataahi so aunihihiri aunihititi Autaahaatihoai neti mepi autahemwane.

¹⁴Iyati ami samihatihiti wo yaawati taati timbiyataataahi Kiraisihopi giwunyaahohiyihyaami gwinyaahiya mitihya jhiyaisi gaatati numwaane kopi gaapunditaatiwo. Gaatati numwaahonihi kiya koaisi atipati werihandi noaapi iwinjaapi Awaisiho komi timbipa nemwaitandi gaapiwundiwise. ¹⁵Aiwi kopi gaapundawaawi Awaisiho utaaho timbaisihoai titihiwitaito, tiwi maariho naasohi gwinyaapi

gaapundisaihaahi, Autaahaatiho timbaisihoai titihiwiwati komi timbipa nemwaitaise. Nemwati ami utaaso timbaindindi ko maipihaiwa kaiwaiwaapi neti timbiyataataahi Awaisiho utaaso maipihaiwa kaiwaiwaisangi timbipaisati ahoyati nemwaitaise. ¹⁶Isi sahi sami maipihaiwa kiyohiwaiwa wonji waanji ami wo waati ausaapi kaundiwi kanwise. Aiwi wonji waanji wo waatapi gaapundiwise, Autaahaatiho sami timbipauni maipihaiwauni ahoyati nesamaito. Iyataati utaaho titihi ainahiho gaaho Kiraisihopi andititati giwunyaaho gaapundataataahi wapa awaiwa watipihaiwa noaipaitaise. ¹⁷Sandapi sahi gwinyaitaatiwi wa kasatitaano, Autaahaatihomi piwiha atisati neti ausaasiho Eraijaaho komi gwinyaati kiyati dahopa dairihireti nyamatiyati gwinyaati kiyati daayahore. Ami nyamatiyati koaisangi nehi utaahore. Siyaho wipati windi wimaawitandi waati mwitetati gaapundataise. Gaapundihi kinaungwiha mairi maatihi waatiho ikwi naasairihitihi wirami naasohi kiyati ko bimimbipihhi yapitaahi wipati windi wimaawise. Wimaawati yatisati nandapa awasati biyati windi namimainje. ¹⁸Aihi ami wipati wipiwitandi Eraijaaho jahira gaapundataase. Japihi gaapundihi tiwipati napapihati wipati namoyaati yamahipati wipati neti nepihoti nuhaasihi wipiwataise. Wipiwati yapipati neti nusoaisihi nandapa jahira biyati nga nimaatati akipipa namoyaataise. Isi sandapi sahi baiwi gwinyaapise.

**Sami Wo Maipihaiwaatihi Noti Nandaahonihoai
Sahi Japihi Numwaapise**

¹⁹Nisi naisihiyaati nisataiwi Kiraisihopi giwunyaahohiyihiyaate, nini sangisi piwiha kima kasatitaani sahi baiwi gwinyaapise. Sami wo samatiyati Kiraisihopi giwunyaaho Autaahaatihomi piwiha namati maipihaiwa kiyati kaiwaatihi noti nandaahonihi, ami sami wonji koaisi numwaasi nambi Autaahaatihomi piwihaatihemapaapaahi sonji gaahandi kaimbi so utaasoai japihi numwaapise. ²⁰Isi utaaho wo ami utaaho wo maipihaiwa kiyonihoai kaiwaami daihira maipihiraapi japihi numwaaso so maipihaiwa kaisiho Autaahaatihoaisi konihi apipaahi windi mausondaatiwihiraapi japihi numwaitaise. Iyati utaaho maipihaiwaatihapi japihi napsihomi maipihaiwa kaiwaiwa taahiwaiwa Autaahaatiho japihi nemwaitaise.